

二
知
軒
文
存

二知軒文存卷三十

定遠方濬頤子箴

王育泉先生家傳

一鄉一邑之間異口同聲羣相推重曰某先生爲有道之士
盛德君子及之鄰郡稱之者如是再之一郡稱之者又如是
重以遭逢喪亂橐筆從軍捍衛桑梓名聞閩闔飾終典渥後
起有人如育泉先生者大江南北無不知先生僅以肥上善
人目之豈足以盡先生之內美懿行也哉先大夫與先生爲
姻婭交最篤濬頤少壯時屢過肥上謁先生辱先生以國士

相待期許倍至欸之冰翠堂先生念先大夫棄養家中落孤
兒銜恤遠游嶺嶠爲之淒然淚下感動座客嗣濬頤自嶺南
歸又與先生數相見先生爲之屏當稱貸視如子姝其時令
子謙齋方攻制舉業先生曰濬頤謂之曰此汝益友汝當與
之相親嗚呼忽忽三十年言猶在耳先生墓木已拱濬頤一
官匏繫欲歸不得猶幸吾謙齋時來邗上藉慰離索光緒初
元仲冬謙齋復至見濬頤方治古文乞爲先生作家傳予曰
未讀先生之狀不敢率爾操觚也今年春謙齋寓書於予以
狀來謹爲之傳曰先生姓王氏諱世溥字濟周號育泉安徽

合肥人世有隱德至四世祖絲與兩弟絳綱以文章吏治顯於時並崇祀名宦鄉賢絲生永闕有篤行祀孝弟祠永闕生裒進士宰商河有政聲冰翠堂卽公所築也裒生元齡是爲先生高祖庠生績學早逝高祖母陳氏奉孀姑吳氏以居兩世苦節奉

旨建雙節坊曾祖會龍舉人揀選知縣入通志文苑傳父運盛貢生以先生貴贈奉直大夫母氏李繼母氏孫皆贈宜人奉直公好施予樂善不倦割產讓弟所居有隙地鄰某強售之償直而還其居周文忠公榜於門曰式是家邦舉鄉飲大賓

入通志孝友傳生子二長世穀次卽先生先生生於嘉慶元年二月初八日性至孝幼時母病目醫弗效先生禱於神舐目頓瘥遭母喪盡哀盡禮茹素三年伯兄中年下世先生獨持門戶先意承志博堂上歡尋遭奉直公之喪先生哀毀如喪母時嗜學工詩古文辭九赴省試四薦不售磊落好義所交多知名士道光己酉築別墅於逍遙津上顏之曰小輞川繪圖徵詩賓朋觴詠無虛日嘗傾財以濟人急而自奉儉約曰吾非自苦乃惜福耳生平不喜言人過推誠接物一無所苟尤能忍人所不能忍至於臨事決疑則侃侃而談剖陳得

失凡當道過肥上者必誼謀詢度傾蓋恐後邑中舊有廣益局育嬰局官吏視爲故事先生力矯其弊務使實惠及人同事皆敬而憚之甲午先生同張浣花應試白門闈期已近張病革無子先生罷試爲之治喪送櫬歸里湖南張大令彝尊罷官僦居於巢之東黃山大令沒寡媳趙氏嗣一子方襁褓張戚袁某故健訟利其產控於有司先生閱故人之後默陳其寃保全弱息千總李某家素封直有大盜之獄蠹役素仇李誣與盜通先生陰爲昭雪之後李知先生之力具千金爲壽弗納壬寅海上有事瀕江州縣風鶴時驚廬州城垣崩圮

邑令沈公祥煦商之先生因與闔郡紳民約贖資庀材先生董其役不費國帑不傷民力閱歲工竣以城工議敘州判加一級廬陽書院亦頽廢丙午栗公烜涖太守任先生力勸修葺躬任厥事更爲籌給膏火獎掖寒畯擔簦負笈者始獲廣廈之安修復包孝肅祠以爲里閭矜式非侈游觀也先生念宗祠未建丁未卜地於祖宅之北市屋一區留建支祠凡族鄰之貧乏者所求無不立應己酉冬邑西鄙民王福崇於狐刻木爲象施符水療疾父老以其惑眾鳴諸官有司欲請於上官捕之以兵先生曰無庸單騎而往毀木象械福至治如

律株連者免先生之待人處事委曲求全類如此

文宗顯皇帝御極初元

詔舉孝廉方正闔邑紳士公薦先生辭不就有司敦趣至再
乃勉應徵壬子夏五大府集入皖徵士而遴選之登上考名
聞於

朝癸丑春吾皖軍興江淮驛騷周文忠視師皖北峻厲嚴重
人皆震懼先生久游文忠之門委蛇進言全活者甚眾上策
保衛鄉里又與同徵之桐城馬三俊廬江吳廷香先後上書
痛言吾皖利弊於團練使者侍郎呂文節公極重之惜格於

眾議弗能盡行冬十月舒桐不守巡撫江忠烈公甫抵廬而賊薄城下城中惶惶先生條列守禦狀洞中機要忠烈大悅爰密使先生搆間諜號召鄉兵嬰城固守者月餘艱難備至援絕城陷忠烈死之先生間道抵姑步甲寅正月謁統兵諸大帥涕泣請圖規復無應者先生感孤忠淪喪知已無人避地居龍泉山自甘肥遁不復問人間事然憂國閔時未嘗不中夜欷歔撫膺太息也乙卯遷居壽州會袁端敏公以蜚語罷斥毫匪張落刑龔得勢正橫防剿豫皖駐師正陽關之侍衛多慧公聞先生名造廬延訪委以團練之事義不可卻先

生披榛履棘齊眾志定規條馬足所之聞先生言罔不踴躍
從事丙辰春擒匪踞蒙擾下蔡壽州戒嚴烽火咫尺無匹馬
敢逾淮者先生毅然以討賊爲任出奇設計五月十五日親
率糧鉏白楮之徒進剿於懷遠耿家湖十九日再蹙之於鳳
臺顧家橋擒斬僞帥葛滄瀧端敏尋起用先五日下午雉河張
龔二酋謀竄壽先生又連敗之賊餒西遁復蒙城脅從者紛
紛反正當建議時士大夫皆笑先生之迂而先生堅忍不拔
卒成其事雖功爲人冒先生處之夷然弗與較也丁巳秋端
敏與某帥會軍潁上併拒粵寇擒匪時淮北初起鄉團訛言

未息二帥知爲先生舊練能折服之遣使寓書虛左以待先生攜謙齋同入幕於是渦河三捷平賊圩者七戊午夏捻匪擾六安沿流東下鳳淮不守淮南北盡成盜藪某帥以先生老成望重奏辦沿淮團練先生招集流亡安撫反側曉以大義感以至誠昔之揭竿挾刃者皆知親上死長築堡砦助官軍三圍鳳陽賊鋒大挫迨招撫議行而團練氣阻秋七月粵寇又陷廬勢甚張某帥督師收撫李世忠駐滁州前兩廣總督徐公廣縉以四品卿起用幫辦懷遠剿匪事宜營馬頭城八月二十七日捻匪自懷遠傾巢出我軍潰賊乘間越山徑

暗襲定遠先生起團兵邀擊於劉府追至上洪大破之九月十九日馬頭大營退下蔡賊復熾南趨廬鉤結粵匪先生諭各團搗巢截其歸路大小十餘戰賊不敢逞旁掠壽鳳竄歸懷遠事

聞以知州用賞戴花翎吁先生之志願至此稍酬先生之心力至此益瘁矣己未春京堂王公廷蘭接辦懷遠軍事營殷澗直鳳臨撫局中變師老餉匱人心滋懼先生力爲維持擘畫軍民稍安三月檄赴宿州與傅軍門振邦密商軍務一僕一馬身經賊巢復由靈壁五河趨泗州渡淮而南達盱眙來

安周歷數百里察看情形四月下旬返殷澗五月二十八日
擒匪犯定遠天雨如注黃觀察元吉營黃泥埠潰先生偕副
都統薩薩布帶練往援翌日解嚴詣池河請巡撫翁文勤公
回軍定遠繼聞盱眙失守某帥屯蔣壩飛檄先生使規取廬
陽以牽賊先生軫念鄉園不惜勞頓病瘡初愈觸暑南征七
月二十日至大瀟山廬六諸團練聞先生來僉驩騰景附先
生力疾從公將以收拾人心遠聯舒六近助湘軍庶可紓國
家之難中途疾發僅仲子尙馨侍側易簣之夕告尙馨曰吾
年逾六旬死無遺憾惟逆賊未滅郡城未復吾目難瞑爾輩

立身行事須心地光明母貽前人羞言訖而逝是爲咸豐九年八月二十三日享年六十有四大府疏請議卹奉

旨贈知府銜廕一子入監讀書先生子五人尙辰尙馨宗培尙煊尙銓尙辰卽謙齋先生抱幹濟才擘究經史兼通太乙壬遁諸書自師文忠講良知之學一以嚴取與辨是非爲先務雖伏處里閭恆思化人勵俗平時訓諸子云與其使人畏不如使人媿嗚呼可以識先生之用心已

方濬頤曰予見先生時第知其果行育德隱惡揚善以爲仁者而不意躬罹兵革慷慨請纓顛沛流離老而益壯則又有

仁者之勇也謙齋語予曰猶記先君子剿賊鳳陽行莫邪山中危橋丈餘據鞍幾墜遂患脇痛胸膈作阻卒至精神耗竭一病不起言之痛心今先生下世已十八年矣謙齋秉先生之教率兩季奉母承歡課子若妣讀書恂恂然非復曩時躍馬橫戈景象蓋由勇以返乎仁先生之遺澤孔長而門祚振興正未有艾予老矣猶及見之也

吳氏貞女傳

貞女者廬江吳徵君廷香之女今直隸正定鎮總兵長慶之女弟而同邑盧佳復之未婚妻也徵君先以文行舉優貢生

咸豐初元

詔舉孝廉方正復預其選直廬江爲賊所陷倡議規復乘賊方怠出奇購間諜率所募卒與其鄉之練丁於四年秋拔而守之甫一月而賊奄至城空無援遂及於難事

聞其子長慶

恩子世職從戎江淮間女甫十齡奉母張太恭人朝夕起居克盡孝道十一年六月佳復病沒時太恭人歸里戚鄰咸來問訊有以盧生死告太恭人者且請爲女議姻適阿姊之幼女在旁聞之洩於眾太恭人入女問母何爲太恭人知不可

秘曰爲汝擇姻女變色曰父在時字兒盧氏又焉用擇太恭人淚涔涔下徐曰從一之義固然第翁姑均逝予身又老爾兄治軍於外脫有緩急將誰恃女曰恃能死遂哽咽不出一語絕粒數日太恭人慰之曰兒志行若此母當爲兒成之同治四年長慶爲徵君建祠乞假還鄉太恭人泣曰妹盼爾歸久矣其送之盧門成渠志也可長慶唯唯祠工旣竣送女往盧家三日衰經祭奠一慟而絕太恭人乘輿疾馳抵墓撫女呼之移時方甦母知女性烈故不得不來也重違母意哭而言曰茲行唯辦一死今旣無可如何乃盧家一未亡人耳觀

者莫不咨嗟太息女請詣盧氏宗人爲夫持服立嗣母留而
月攜女返自是相依爲命母非女不安女非母不言太恭人
以女不如輩別具鑪竈親爲洗滌女偶見之愀然曰以兒增
母劬勞兒獲舉重矣請自今聽兒自爲食居恆布服練裙聞
貧而嫠者白於母仗助之終日靜默未嘗露齒然當太恭人
室中端坐童孫稚女羅列滿前則稱說古今列女賢孝事媿
媿不倦九年春太恭人就養揚州十月棄養長慶方統淮軍
駐五臺山哀毀欲絕一夕阿姊以飣粥來曰弟胡不食小妹
殆矣曩者母寢疾藥物多由妹進我掖母起誤觸其臂作負

痛狀戒我勿言蓋恐以割膚傷母心也今水漿不入口又數日其何以堪兄往勸之食不應堅勸之乃言乙丑不死者母意難違今母以天年終妹志決矣兄大慟曰母存妹存母亡妹亡自爲則善如兄嫂何眷屬皆與始強起然而比母在加瘠矣迨十二年二月母服除女歸夫家夏初病作醫來不就診兄書至亦不願以六月朔日病沒年二十有九將逝語阿姊曰十餘年茹藥含冰今病且死初志遂矣惟誓心麻縷入棺時姊幸爲易之大府聞於

朝下部旌表如例

方濬頤曰予與小軒軍門交有年旣得讀毅甫所作徵君墓誌以一書生捍衛桑梓捐軀報國而小軒復能請纓投筆移孝作忠是皆有大過乎人者庸詎知閨門以內秉徵君遺訓矢柏舟之節如女弟者又卓卓可傳於世也始則以母故求死不得繼則欲從母死爲兄所阻不得願卒以憂痛嬰疾死是則與蓋棺時從死何異哉全貞盡孝獨爲人所難能以遂其初志嗚呼誠不愧爲徵君之女也已

節孝李母陳夫人家傳

夫人姓陳氏武昌世族年十八歸鄭州李君錫嘏甫一稔而

夫卒守節三十七年以夫之仲弟翰華官江南山旴同知加

五級

馳封淑人又以叔弟常華官江南常鎮通海道

馳贈夫人請

旌於

朝李氏故中州閩闕夫人之祖翁諱國瑞官淮揚河務兵備
道重闡具慶一門四世雍雍如也夫人遽喪所天飲冰茹蘗
顧深明大義不敢以悲戚之狀增堂上憂朝夕問安視膳克
盡婦道夫弟三人季曰寶儉均在齟齬其姑沈太夫人以子

女多不暇顧復命邱嫂代撫之寒暖提撕既周且至分姑之勞嗣先後授室則又躬率妯娌承歡罔懈翰華生長子肇恩嗣爲兄後常華生一女亦俾嫂氏女之時三代考妣皆棄養翰華官於南河迎嫂氏至署家政悉聽裁決焉嗣常華生子肇文甫一歲而喪其母襁褓無依則又賴世母鞠育之直東南軍事起翰華從戎皖豫間常華官京師夫人挈嫠口流離轉徙艱苦備嘗因而遘疾迨同治丁卯始至京師亡何竇儉沒於江南其遺孤肇鏞未及周晬煢煢失怙夫人恆念之不釋戊辰冬病劇至己巳二月十九日卒年五十有六夫人處

事識大體御下有恩族黨親戚無間言卒之日臧獲無少長咸哀痛不輟其感人可知也

方濬頤曰人謂貞性苦節莫難於貧賤之家然則富貴之家殆以爲甚易耶天下庸德庸行常情往往忽之而烏知堅定之操歷久不渝數十年如一日在士大夫尤不多見而況巾幗乎予與夢蘭叔彥昆弟交最久每向予嘖嘖道嫂氏之賢予旣爲叔彥作墓誌而夢蘭又乞爲夫人作傳嗚呼若夫人者洵不媿爲女宗也夫

雲南布政使蕭公家傳

公姓蕭氏諱浚蘭字儀卿號鄉泉先世居長沙泊宋時諱維
嶽者官福建延平府通判始遷高安遂家焉自支祖大拔公
至曾祖映春祖物華凡六世皆爲諸生考元吉乾隆庚申舉
人學行見重於鄉里世稱爲謙谷先生官至河南陳州府知
府有政績崇祀名宦三代以公貴皆贈通奉大夫妣皆贈夫
人公以道光壬午年九月初十日生謙谷先生方宰祥符故
小字祥官幼讀書穎悟過人先生春秋已高甫舉一子絕鍾
愛之道光丁酉年十六欲歸應小試先生不許行強而後可
是年補弟子員旋舉於鄉甲辰成進士改庶吉士散館授職

編修丙午典試湖南得人爲盛尋奉

命視學雲南以錫士習培人材爲念丁未嫡母鄭太夫人
棄養謙谷先生時守河南公聞赴哀號欲絕由滇星奔至洛
踰年先生調守陳州亦卒於官公迭遭大故屢喪葬
盡禮服除遷江南道監察御史掌江南道御史尋署京畿道
事轉工科給事中擢甘肅甘涼兵備道署甘肅按察使以功
賞戴花翎調四川按察使擢雲南布政使直回匪搆亂道途
梗塞同治癸亥以到任遲延部議鑄職

穆宗稔其才命留營幫辦軍務丁卯以功

賞四品頂戴並

賞還花翎

朝廷方嚮用公而公又丁生母吳太夫人憂己巳扶櫬歸里經營窳窳事畢僑寓南昌於癸酉十月三十日卒年五十有二公配曹夫人繼配錢夫人篋室王氏尙氏曹氏子二彝曹夫人出裕昆尙氏出女九人孫熙盛女孫一人葬於高安石腦橋西南山之陽公之官翰林也博聞強識少所誦習歷久不忘熟於國家掌故尤好獎掖後進公之居科道也屢上封章彈劾悉當豫章苦寇公則指陳軍事得失直言無隱巡視

中城有驄馬御史之目公之轉外臺也治官書甚勤至累日夜廢寢食數決疑獄雪民之冤辦理番案其尤著者擅知人之明屬僚晉謁立談之頃卽知其材否凡所委任事無不舉乃中道蹉跌羈滯戎幕者十年海內識公者皆惜公才之未盡也家本素封嗣中落謙谷先生以廉吏而好施予有田若干畝每歲所入以贍族人戒公絲毫勿取曰吾既有祿足以代耕矣厥後子弟之不肖者質田於人公還鄉贖田仍以贍族人己則稱貸度日而戚儔友朋之求助者踵門而至食指浩繁臧獲以數十計債負甚巨而座客常滿軀幹短小眉宇

精悍遇二三知己抵掌雄談傾吐肝膈終夕無倦容肫摯坦率本乎性情而豪邁絕倫又有勃勃不可遏之勢脫合任天下大事自無不措之裕如也而願止於是焉天道尙可知乎哉

方濬頤曰予與甲辰同年生交誼最篤蹤跡最密者雪帆侍郎而外無過於公曩在京師同居魏染衲衲無一日不相見予有緩急商之公無弗應者公善相人願阿私所好動以遠大相期公先予外出備兵隴右尺一往還歲時不絕及予三至嶺南道章江適公家居久離忽合語絮絮不休迨予度嶺

返揚州復爲公句留數日勸公作出山計公曰身爲債帥屏
當北上故大不易行將挈眷屬僑居竹西以累吾子俾得單
車就道吾子其許之乎予曰諾自是予作書輒趣之來忽忽
四稔癸酉夏得公書期以九秋來此而孰知公竟一病不起
耶光緒初元孟冬其孤彝以事往山右過揚州持公墓誌見
眎乞予作家傳每一念公淒然腸斷因而閣筆者久之光陰
荏苒春盡夏來重違宿諾負我良友侍郎墓誌旣成乃爲公
詮次事蹟以著於篇願視作草之筆猶公往日所贈不禁淚
和墨墮云

孔宥函太守傳

齊叟玉谿曰者投心嚮往齋詩屬爲作序未有以報又持太守之子廣稷所爲狀眎予曰太守爲吾至交以身殉國子盍傳之予以狀中無死事月日詢之玉谿則不能記憶因置之案頭久之于漢卿來偶言及太守漢卿曰太守死事月日子固知之乃作傳曰君姓孔氏諱繼鏞字宥函號廓甫亦號晚聞生至聖六十九世孫先世自曲阜三遷至大興曾祖興柱拔貢生覺羅官學教習候選知縣著養正錄曾祖妣氏徐旌表節孝祖毓煊副榜貢生候選直隸州州判祖妣氏于毓

焯公性至孝妻卒遂不娶以子兼婦奉母至六十有一遭母喪哀毀如孺子瀝指血書憶母病源記葬則日號於墓洎足痺不良於行則時時拄杖中庭如出門上芻步數拜且哭著有續人譜類記律呂考略綱齋詩文集及隨筆烏啼集諸篇藏於家考傳坤寶應主簿崇祀寶應名宦祠事蹟詳府縣志妣氏吳三代皆贈如君官吳太淑人君卽嬰疾家故貧無力雇乳婦哺之以饒故體孱多病太淑人嚴課督之不以孩提而少寬假也君負異稟於書無所不讀七歲賦紅梅有春日家家雨梅花處處雲之句十二歲登禹王臺作絕句人皆

詫爲奇絕塾師某以妨誦讀禁勿作十五歲卽以聖賢自勉
造次必依禮法箸自責篇備忘錄弱冠遊京師鉅公先達有
國士之目受業於潘四農先生所學益進又與張際亮湯鵬
葉名禮魯一同吳昆田諸名士爲文字交朝夕砥礪雄視坵
壇於斯爲盛壬辰舉於鄉癸巳考取國子監學正丙申成進
士以主事用籤分刑部君念終鮮兄弟不忍遠離父母適海
上多事君奮然捐練水勇下部議敘以同知用發往南河君
潔己愛人臨事不苟凡有關於國計民生者靡不實事求是
尤嫻於水利軍政指陳古今洞察利害督河使者恆倚重之

而人多忌之吳太淑人患咳君在工次聞他人嗽則心悸曰
父母愛子無所不至子侍父母不能曲盡歡心身入宦途疎
於定省甚無謂也於是決然求退爲終養計遷居寶應之白
田堡賃園林以娛二老卽所謂心嚮往齋也栽花種竹籠鳥
養魚凡親之所喜者力必致之閱六年嚴親棄養哀號躡踊
淚皆成血又恐傷老母心則吞聲飲泣因而氣凝胸膈每一
痛心手足厥冷汗下如雨服闋後仍不出戶日侍太淑人側
太淑人喜聽稗官小說每夕必說數冊俟太淑人倦而思睡
乃止就寢甫退黎明卽至牀前問安有疾則衣不解帶食不

甘味蓋數十年如一日也宗人多貧者招與同居食指以百數十計有無賴者以巨石撞釜立碎君聞之命易釜而不與較且戒家人曰是我之咎使汝等不能速炊也又有戚盜賣田廬亦聽之交遊徧天下然諾必信從不負人人有負君者君處之夷然或攘君之功以爲己功者又漠然弗顧也晚尤邃於理學當道延君主講鍾吾書院再卻之母命往因不敢辭桃宿之士聞君將至舉欣欣然有喜色不遠數百里懷贄爭先來謁也直粵寇披猖揚州不守寶應人心皇皇君怒甚髮上指呼二子持刀械相隨往殺賊回首見太淑人坐堂上

不覺跪而膝行至前嗚咽不能成語或勸之曰君無城守責當辟地奉母以居遂買舟之江平莊身雖奉母心則憂國仰天浩歎潛然涕下某大帥規復揚州素稔君忠義延之入幕並疏請移孝作忠君固辭不出時太淑人病方愈責君曰人生天地間國事重耶家事重耶幸毋以我爲念汝不出是速我病也君重違母命勉至軍中爲陳方略終以母故旋告歸亡何太淑人病君遂不出閱二年太淑人下世君悲慟暈絕者屢屢旣一晝夜始得甦猶哽咽喃喃曰兒在此兒在此嗚呼可謂純孝已養親事畢長白德興阿公招赴江浦大營奏

司文案以功

賞戴花翎會我軍不利大江南北在在戒嚴君竭力籌維十晝夜不得眠食大營兵潰君衣冠手劍力斫十數賊家丁丁福熊元徐林邵林佟二均挾刀矛左右衛賊知爲官也白刃交下君遂遇害時則咸豐八年八月二十二日也熊元丁福佟二各被創死惟邵林受傷梟水得生徐林受三十七傷墮於深濠閱十餘日遇救不死戈什哈黃玉目睹具述其狀云先是江蘇巡撫吉勇烈公獎君之勞奏擢知府迨殉難事

聞

贈太僕寺卿銜世襲雲騎尉兼廕一子入監讀書

予賜祭葬入祀昭忠祠君元配丁淑人繼配殷淑人子二長
廣稷丁淑人出軍功三品銜候補知府次廣牧側室劉氏出
廕生以知縣用在山東軍營積勞病故待郵女八人孫三人
廣稷曰心嚮往齋詩古文辭刊者僅十之一吾母殷淑人有
槃窗詩草吾弟有先聖生卒年月考勿二三齋詩詞集均未
刊也

方濬頤曰太守以謀養親改官於外嗣以親老棄官不出薄
人爵而尊天爵內行敦篤風雅絕倫由此閉門著述夫亦可

以不朽也乃致命遂志忠孝兩全在他人處此或且潛身遠
遜以爲但治官書非有折衝禦侮之責卽通權達變固無不
可者而君則以文臣參戎幕視死如歸鐵中錚錚名垂天壤
予雖不及見君得交君友述君大節亦不禁心嚮往之云

徐氏孝女傳

女姓徐氏揚州人父某以鎔銀爲業居通濟門內徐家巷徐
故右族後式微至某遂淪於工女生六齡而父沒母守志撫
女家壁立食貧茹苦女性明慧雖在孩提卽能分母勞凡井
臼烹飪鍼帶紡績之事母所拮据不遑者維女實左右之年

及笄欲爲議婚女聞慙然曰母之劬勞爲兒也今十餘稔兒長母且就衰兒鮮舅弟又無姊妹兒適人誰爲母也養者執不可揚州固東南大都會繁富甲他郡婚嫁之家金玉錦綺充匱盈筭飲酒宴樂爭相誇耀一時比閭族郇姻戚鄰里長者少者齒相若者皆各有所歸而女則視之泊如惟一意奉母朝夕相依爲命旣而年益長孝聲益著問名者日益眾踵於門母衰且病因謂女曰我之劬勞爲兒也兒齒日增兒不嫁終爲我憂我病日甚熒熒母女孰則閔之與其母女相守以終盍若得佳婿就養之爲善乎女聞母言意不自安乃正

容曰母愛兒可謂至矣願兒亦計之熟兒女也身無嗣續之
繫行止可由兒志兒不樂有室家兒志也母不病嫁且不可
今病矣曷忍舍旃使兒舍母以去卽當盡婦道婦道主順爲
兒舅若夫者許兒迎養兒母幸甚脫不許則將順之是兒不
得與母俱也是母終不得有兒也兒賴母以生母獨不能資
兒以老乎議聘者方在門聞女言咸太息以去自是遂無敢
復議者女因得奉母以終天年女今者年逾七十丹徒陳子
勤孝廉之友戴小農與女比鄰而居習聞其孝爲子勤述之
子勤撰事略以眎小農小農遣其家人往看女女方臥病告

二九
三
之曰陳孝廉將乞某公爲姑作傳女聞言目遂瞑貌如生異
香滿室時則光緒丙子五月二十六日也

方濬頤曰孤介之行堅忍之操士大夫往往難之彼絕裾而
去者心乎國家不知有母果得爲名臣也耶區區一小女子
幼而失怙無教之者而乃守貞不字奉母以終人或且目之
曰愚夫非愚則烏乎能成其孝也子勤言女家貧甚無力請
旌願公作文傳之予故亟著於篇以風世勵俗云

贈通奉大夫沈公家傳

公姓沈氏諱道寬字栗仲先世居浙之鄞縣高祖紹璣妣氏

戴曾祖鈞妣氏張皆有隱德考謙借其兄素遷居順天大興
遂占籍焉謙公補學官弟子以騰錄議敘選江西大庾縣典
史妣氏張生公兄弟三人齒居仲幼讀書聰穎過人舉茂才
試輒優等食餼嘉慶九年應京兆試中式舉人時謙公棄養
久家貧橐筆作諸侯賓客始游津沽繼而中州嶺南抵於山
左當道皆爭相延致聲稱藉甚如是者十餘稔二十五年始
成進士以知縣用分發湖南道光元年攝甯鄉二年攝道州
均有政聲三年補酃縣五年茶陵鄧阜山蛟爲民患公奉檄
辦賑全活無算八年調權茶陵州十年回任十一年充鄉試

同考官是年江華獠人爲亂鄢之龍榨獠生齒最繁他邑率由此遷徙古有四姓今則唯盤氏趙氏其分居於桂東南麻者悉聽龍榨獠指揮亡何民間訛言大府傳檄凡獠人勿論良莠盡殺無赦於是羣獠持械登山具餼糧與官兵敵時則權桂東令者爲何彤文遣急足持書至鄢問公公答曰斯事易了也卽夕命健役持諭帖往盤雲遠家雲遠者巨富爲獠之頭人名曰獠管其人素恭順羣獠咸受約束公故招之赴中村已則馳往中村待其來獠山距城東南百里中村距山之南十里距城亦百里公弗徑至獠山者恐獠人弗察誤以

爲官來討我也。獠管至中村見公公遣其弟雲鳳往諭南麻並達其狀於桂東雲遠曰。峒中人眾勢洶洶欲鬪雲遠力弱無以制之。官爲民之父母愛吾獠與赤子無異。獠之服官非一日已。官不鄙棄吾獠。惠然命駕而往。俾得望見顏色。其誰不唯官之言是聽。歎公曰。吾卽從汝入峒。雲遠又曰。官宿於峒以示不疑。則羣獠無不罷兵者。公曰。可入峒。羣獠環跽道左。公諭之曰。爾輩食毛踐土向化歸心已久。

朝廷一視同仁。撫之字之。豈有不教而誅之理。繼自今其各安本業。勉爲善良。慎勿惑於浮言。致罹法網。羣獠聞公言泣。

數行下弭首帖耳投戈解甲無復有鬪者公宿於峒明發公
歸雲遠曰官無憂脫有不靖唯猺管是梟龍權之猺一言定
亂而南麻亦皆安堵矣十二年調權未陽是冬調補桃源十
八年以事去官僑寓長沙與湘南人士訂文字交觴詠流連
殆無虛日以宰官而作名士擅詩歌工書畫求者踵門不絕
畫不肯輕作書則一縑片楮人得之珍如拱璧云又善撫琴
奕棋精於篆刻旁及星命之學靡不研究入微迨咸豐二年
粵賊犯楚長沙戒嚴遂買舟東下僑寓揚州三年賊陷金陵
復徙居泰州是年九月卒年八十有二公配劉夫人繼配高

夫人子敦蘭道光丙午舉人考取內閣中書戶部郎中陝西
道御史擢江蘇常鎮通海兵備道加布政使銜三代贈如敦
蘭官

方濬頤曰彥徵觀察與先兄奮青爲同年生又與家弟子嚴
先後同官內閣同直總理各國事務衙門故與予交最久予
心欽之今者持節來潤州湘之人居邗上者告予曰是爲栗
仲先生之公子嘖嘖道先生撫犒一事夫先生宦楚將及廿
年其他善政不可枚舉而卽此一端已足見其從容鎮定杜
亂萌而安反側者造福爲不小也彥徵秉先生之教於中外

交涉事持正不阿商民翕服既刊先生遺墨上石並以詩集雜著付之手民嗚呼栗仲先生可謂有子也已

馬氏烈婦傳

烈婦姓陶氏上元人世居杜圭村爲金陵望族烈婦幼有宿慧長嫻詩禮適同邑優廩生馬矩馬生父某曩官通州廣文遂家焉生弱冠卽患痰喘之證烈婦來歸倡隨靜好朝夕侍夫疾躬親藥餌辛勤況瘁十數年如一日生則踏蹬名場鬱鬱不得志病益加劇同治癸酉秋以赴試沒於白門凶耗至通烈婦聞之毫無戚容揚揚操作如平時戚儔之來唁者素

稔烈婦明大義方訝其遭大故曷爲從容若此曰是固可虞屬其家善防之是夜烈婦竟仰藥以死年三十七歲生一女殤無所嗣

方濬頤曰族子書紳以烈婦事略寄予予惟烈婦平日之侍夫疾操心慮患已有同穴之志故一旦聞變夷然不動聲色蓋恐以死告人人必不聽其死也且旣判一死又奚樂乎人之知之也顧獨怪夫彼蒼成婦之節而不使有後之一何憤憤也嗚呼

亡室周夫人事略

亡室周夫人爲商城相國周文勤公女在予家廿餘年移其事親者事吾親克盡孝養之道深得堂上歡予成進士夫人奉尊章命率子女來京師持家勤儉俾無內顧之憂予喜交游性又嗜飲夫人每正色相規謂宜受之以節予甚德之迨己酉秋奉嚴諱歸里吾母楊太夫人時亦多病知予債負甚巨俟先大夫窀穸事畢趣之度嶺爲屏當計予私念有夫人代奉晨昏而身累又不可不早爲籌畫也庚戌三月遂貿然出門孰意是年之冬太夫人卽棄養耶嗚呼痛哉幸夫人偕兩弟婦治內事吾兩弟治外事合殮均得成禮辛亥予自嶺

南返里門壬子奉揚太夫人匱安葬於萬善寺之新阡遵遺命也癸丑服闋方擬入都而粵寇東下已陷金陵吾鄉土匪聞風四起道途多梗斯時毀家紓難生計益蹙夫人處之泰然迨避亂孔岡喧傳寇將至夫人亦漠然不爲動乙卯春予偕九弟子聽北上夫人繼至篋中僅餘米提三百耳先是予在京師旅費已不支夫人屢爲稱貸於其姑母之家予自嶺外歸始寄償之及再至京師則空乏彌甚夫人爲長女贅壻復爲予置簾室謝姬一家團聚其樂方長乃長媳章淑人於丙辰春病沒夫人自撫耀孫使乳媪臥於牀前夫人曾三患

乳癰以勞瘁太過遂成乳岩之證醫治罔效慘於丁巳八月二十九日棄世得年四十七歲厝於天仙庵次女贅孫者以癩癰殤亦同厝焉至同治戊辰子來揚州始遷其匱歸廬州厝西鄉之土樓莊嗚呼夫人生於閩閩之家而能孝敬無違食貧茹苦若此向之患難夫人與子共之今之安樂夫人遂不獲與子共之予之負夫人者多矣雖

鸞章屢錫榮及泉臺長子得官幼孫拔萃簞室所出尙有二子二女孫媳已生曾孫女二天之待吾兩人不可謂不厚而夫人顧不及見之傷何如也今年擬延形家爲夫人卜幽宮

因先述其懿行以丐有道者誌墓之詞

亡姬謝淑人事略

亡姬謝氏天津人咸豐丙辰予官京師姬以二月來歸時亡室周夫人爲予物色筵室得姬甚喜姬年十六貌端麗而性極明慧歸予甫三日子以引

見御史名列第二卽蒙

顯皇帝擢補山東道周夫人笑指姬曰汝福命佳入門卽有好事也姬侍周夫人起居維謹與亡媳章淑人相款洽時長女次女方在室姬均得其歡心章淑人卽以是春病沒周夫

人旋患乳岩至丁巳八月病劇泣告予曰謝姬年雖小甚知大體可爲君內助宜善視之周夫人卒於二十九日姬哭泣盡哀持服如禮時長女已贅婿生外孫八叔父及叔母挈弟妹輩避亂間關入都依予而七弟濬復攜媵屬亦踵至五弟濬師官內閣迎養三叔母至京邸與予居相近一門之內長幼無不愛姬者姬恪守禮法有大家風予性好結納長安舊雨飲酒賦詩無虛日歸或至三鼓姬挑燈坐待寒暑罔間予甚媿之孫燕昭甫四齡卽喪祖母與母姬撫畜之無微不至次女患癩癉甫贅婿遽於戊午七月病沒三年之中予疊遭

變故生趣索然是年十二月姬生三女榴官子心爲之稍慰
己未秋姬有小產之厄十二月子蒙

恩補授南韶連道庚申春爲長男續娶王氏屏當一切賴姬
之力居多閏三月盡室南下行抵邢臺姬方有娠因乘騾轎
仆於地復至小產休息八日遂就道姬體素彊健數月間兩
患小產兼以長途跋涉風入腠裏病根卽於是伏六月至湖
南耒河以樂昌爲賊所陷道梗折回衡州舍舟賃屋以居姬
患嗽劇甚至七月予以憑限迫先行過郴州聞樂昌收復九
月媵屬繼至韶州則姬病已愈是年冬六叔父及叔母全家

度嶺次年六弟挈子女亦至未幾四叔母復自商城來骨肉
數十口團聚官廨姬一一爲之製衣裳備簪珥絕無吝色亦
無倦容他人或以爲糜費而予則甚喜其能匡予之不逮也
辛酉夏予以微疴誤服補劑遂患痰厥昏迷者累日以爲必
死姬痛哭誓以身殉幸而得瘥迨是秋右臂生柳纏綿三閱
月至冬始愈姬侍疾甚悴體遂多病同治壬戌九月予偶感
寒患風疹久而不愈至十月初五日痰壅如上年一晝夜不
能安枕又以爲必死呼家人告以身後之事八叔父精岐黃
術亦以爲候屬危險時長男需次湖南遣人往促之歸姬與

長女私議去年之病曾服牛黃少許今何不仍投以牛黃丸
或可得生機遂以半丸進予服之氣愈上逆目瞪神昏者又
兩時許至日晡倦而思臥姬扶掖就枕酣睡至二鼓醒而暴
下所患若失癸亥春姬復有娠予心惴然嗣日服八叔父安
胎之劑獲無恙十一月十六日生次男臻廣先是庚申冬姬
爲予納朱氏婢至是亦有娠甲子八月生四女子於六月泄
鹽運司任故以粵秀名之姬撫如己出阿秀生而多病乙丑
十二月殤姬哭之慟是年秋姬患嗽誤服辛散之品嘔血三
夜醫數月始痊丙寅春姬復有娠時八叔父以九弟濬益需

次吳門將往就養姬欲留行不果至九月姬復小產自是飲食頓減嗽疾時發十一月朱姬生五女姬命名阿東愛之甚丁卯之夏嗽益劇日見委頓今歲閏四月因外感風邪鬱熱於內遂成勞傷之症日延數醫診視皆謂能治蓋以啖西瓜可止瀉飲冰而胃愈強也惟梁醫崑山則謂過服寒涼必至無根之火上冲惜予不能聽其言迨六月初二日臥牀不起投以清補之劑外熱退而內熱終未減因再延梁醫診視謂非用葠不可因急購土木葠日服一二錢佐以著朮斯時胃氣已敗唯飲米露代飯然神不少衰自謂萬無生理絮絮以

兒女幼稚爲念予多方寬慰之私計十九日立秋能過此或
可望痊至十八日果增劇十九日稍安二十日與予訣別謂
君之待妾有過尋常不幸福薄遺小兒女累君何以爲懷妾
不能侍君百年實負罪於地下未卜再世尙能補報否予聞
之淚下如雨二十一日戌刻以後痰絕者屢屢丑刻命婢姬
扶掖端臥而逝傷哉予病姬能以藥生之姬病予反以藥誤
之負疚多矣猶憶姬於每歲除夕必焚香默禱者終夜一日
予問以何事姬愀然曰吾之所禱者蓋欲減十年壽與君耳
予曰子太愚矣安見有能分壽與人者哉嗚呼姬待我十三

年竟舍我而去耶痛何如耶姬沒後劉姬告子曰朱姨會三
次割臂和藥而病竟莫瘳予聞之駭然驗之良然詢其何時
則去年十一月今年正月及閏四月二十三日也昔周夫人
病劇時吾大女亦曾割臂盡孝今不圖復見之於朱姬能不
令我腸斷耶爰撰聯語挽之云人間到此九迴腸感頻年除
夕告天求減算以益衰齡竟爾秋風悲永訣地下可知三割
臂念幾載相依爲命願毀身以療沈痼斷無兒女泣單寒蓋
紀實云更可異者姪女阿定願爲姬服暮年之服而六七兩
弟之子若女三人其父母皆命爲姬持服六叔母問予合於

禮否予曰聖人緣情制禮情之所感出於至誠雖過乎中聖人不禁是爲亡於禮之禮也嗚呼姬之賢淑卽此可徵已姬生於道光辛丑年六月二十二日寅時卒於同治戊辰年六月二十二日丑時得年二十八歲以嫡子臻大候選道加鹽運司銜恭遇

覃恩貤封淑人姬好文史從予讀唐詩數百首去年復讀毛詩及四子書每日十餘葉因病劇中止予有詩癖遇得意之句向其吟哦亦頗能解大義又好施與有需次微員因妻沒貧無以殮鬻女市棺姬急貲助之勸其勿鬻復以數百金施

棺木其買魚鳥放生以千萬計他如惜字紙散棉衣趨善事若驚而竟不永其年或者天留以報其子耶姬每以予年逾五旬故鄉兵燹家無一椽曷不及早挂冠作買山計趁此精力未衰得以息影田園教子課孫其樂不勝於應官聽鼓耶予心甚慙之而遷延未果今年復屢向予問歸期且云遲則恐妾不能待噫今竟不及待矣梅銷關畔剪紙招魂北雁來時定須踐約魂兮有靈尙其鑒之

智明上人出家事略

逃儒入墨孟子非之若夫棄官爲浮屠氏舍向之所學而遁

跡空門自屏於四民之外有乖乎聖賢之道者則又何說曰
是固限於遇迫於勢而有不得不爾者其志可哀其行又甚
介吾不得不爲之表襮焉以傳於世也智明上人俗姓張氏
籍仁和今爲僧故隱其名大父湄以孝廉官瑞州太守其父
母隨之任所生子二人智明居長十九歲補學官弟子道光
己酉登拔萃科咸豐元年向忠武公羅致幕下掌文書獄獄
司軍犒兼筦石埠橋十九洞煤廠以資大營士卒炊爨所在
有功奏獎以知縣用五年江蘇巡撫某公檄統帶廣東德復
兩營勇七年隨四川總督吳公振械赴滇黔辦理教匪事務

事平加同知銜

賞戴藍翎十年春回浙由川而陝而汴直粵賊披猖道途梗阻杭州失守全家三十餘口皆死於賊智明不得歸復侍吳公回陝陝西巡撫譚公廷襄稔其才留省需次同治元年權寶雞縣事回匪圍城則召勇數千人登陴固守與賊相持二十月之久大兵至圍解當是時大府將登薦牘顧以所募勇糧爲數至鉅主糧臺者駁斥之而寶雞紳民知其核實無浮冒咸爲冤之典衣稱貸猶不足以償遂請急歸六年赴皖當事檄令浚宿州河嗣大府命司營務處文案十年又有甘涼

之役光緒初元返浙屏當北上道揚州資斧告匱而所識者則返江右困逆旅不得行於今年四月披緇爲浮屠居文昌樓上予書于閔之爲籌香火之需來謝予予詢其家世具述顛末如此年甫五十有一工書善畫予喟然曰不官而仍爲士賃廡傭書自食其力亦奚不可乃必爲僧耶愀然答曰半生來功名富貴歛若幻泡媿屬妻孥慘羅鋒鏑四大皆空子身焉往唯公亮之子又曰其如先人無後何曰有弟在亂後續娶已生二子足繼宗祧故智明可以爲僧嗚呼勝國之季遭逢陽九棄官爲浮屠氏者比比然或終於僧或不終於

僧而其人則皆豪傑有道之士也今非其時智明卽無家無
官出其文藝尙可爲溫飽計且令有人焉援之以手亦安見
冰雪之不轉爲陽春也哉吾於是訝天之生材而故阨其材
弗竟所施者之爲可怪也

二知軒文存卷三十一

定遠方濟頤子箴

贈太僕寺卿候補知府刑部員外郎竇少梁府君墓誌銘并序

君諱元顥字少梁姓竇氏邳州人其先世自山西沁水縣遷居傳十餘世至曾祖良秀家始豐乾隆五十一年歲大饑捐貲施粥鄉里有善人之目祖照四父象彝附貢生候選員外郎置義田千畝創立義塾以贍族人並課其子弟讀書有司聞於

朝建坊旌之配莊恭人生子三長元渾次元清君則其季也
幼孤母莊恭人獨愛憐之君生而孝友童子有成人風不恃
親之愛稍凌其兄也而兩兄亦深器之年長卽委以家事君
善承先志鳩工建義坊延名師入義塾兼修家廟春秋享祀
維虔凡宗族鄉黨之來求助於君或干以事者慷慨應之鮮
有難色俾各如願以償邳之人無不重君者弱冠補博士弟
子員兩應鄉試不售入貲爲郎籤分刑部時仲兄元清亦以
拔貢生官內閣中書舍人昆季遂奉母居京師君雖入秋曹
終以未得科名爲憾識獄之暇手不釋卷習制舉業攻苦如

寒儒咸豐元年舉順天鄉試旋補員外郎缺以母莊恭人嬰疾思還里君偕仲兄乞假奉板輿歸未幾而軍事起粵寇熾於大江之南皖匪擾於長淮之西徐州則當其衝所屬蹂躪過半君言於仲兄曰賊勢如此必將及我毀家紓難捍衛桑梓卽所以報國也仲兄是其言君遂以團練自任捐資募勇出粟築圩鄉人皆踴躍從事防守立備九年之夏皖匪渡運河北竄台莊官河窑灣諸鎮皆失守而君所居獨無恙十年自春徂秋匪又兩欲渡河君隨署邳州牧張君富年前任邳州牧周君力城先後會合邳宿三州邑五十餘圩練勇據

隄固守賊不得逞者再大府獎其勞

奏入奉

旨服滿以知府用賞戴花翎蓋君甫奉慈諱不得已墨經從戎移孝作忠志逾堅而氣愈壯已十一年七月賊竄入山左九月回巢取道於鄭攻上灘圩上灘乞援有言賊眾不可往者君奮然曰同盟而不赴非信也在難而不急非義也會袁端敏公督辦剿匪事檄候補道張君汝梅駐兵邳州君往請得子參將振甲一軍同往先是君約各圩之勇來接應及官兵與賊交綏而各圩多後期賊大股圍至眾寡不敵戰二日

遂及於難時則九月十七日君之原配莊恭人生女一適崔繼配宋恭人生子鴻年甫六月猶在襁褓也事

聞 贈太僕寺卿世襲雲騎尉建立專祠君之兩姪鴻謨鴻書上灘之役俱從君作國殤邀

卹如例濟頤曩官京師與賢昆季交甚篤喜鏡泉舍人之坦率和易而尤服君之機敏善斷豪邁絕倫花晨月夕過從罔間及濟頤奉諱還鄉君時馳書拳拳慰問乙卯再至京師則君昆季已歸去君死難之日濟頤在嶺南久不得音耗甲戌三月鏡泉拏舟至邗上握手欷歔出一編見眎曰此家弟死

難事畧以其年十月初八日葬於白溪之西君最知弟盍爲誌其墓嗚呼與君別二十五年而不相見乃厪一見君之兄讀君之狀殊可悲也然而君門之楹矣銘曰

温温儒生治軍旅報國以身得死所君志未就名終古厥後必昌天佑汝幽宮有靈鑒斯語

朱蓮塘封公墓誌銘

公諱宗潘字蓮塘又字霞汀姓朱氏先世與徽國文公同祖至中孚公由婺源遷涇之東鄉黃田遂世爲邑之望族曾祖廷衢

馳贈通奉大夫祖學灝考一定俱太學生

誥贈榮祿大夫妣胡太夫人生子二公其長也性孝友宅父憂慟幾絕遂搏勤奉母母年九十有六始卒公已逾七秩矣號泣擗踊猶如嬰兒弟宗璵出嗣析居時分財贍恤之家庭之內雍雍如也幼而劬書喜吟詠熟於史事居恆常引爲法戒以家道中落棄帖括操鴟夷術歷游湘鄂閩粵吳越間束躬勤儉遂致饒裕慨然曰儻來之物鳩而不分是守錢虜耳顧散亦有道縱意揮霍以爲豪舉吾亦無取焉於是壹志爲善建義倉立義學置義山義田見義必爲常若不及於鄉邑

修榔橋河浙溪湧溪三石橋於長沙修官道暨長壽街大路
至數百里於平江修龍門義口兩橋兼造航以利濟於廣東
佛山福建延平江蘇江西河口等處置漏澤園設育嬰堂所
至爲眾善倡江右兵燹後歲洩饑餓孳載途溝瘠枕藉爰自
湘鄂購運米菽以賑之并分路資遣流亡全活無算先後收
瘞骸骼六千有奇平居施藥捨棺給衣散粥無虛日遇族黨
艱於婚娶喪葬者厚飲之各如其願扶持顛危排解紛難善
言善行難更僕數矣初喬公松年撫吾皖諭地方捐輸爲善
後計公季子記名道守謨以父命倡捐喬公義之專疏請獎

奉

特旨賞給三代一品封典誠異數也公益感勵既率邑人修復學宮復獨力建郡學閱四稔糜四萬金始落成中丞英翰公聞於朝

天子以公急公好義命地方官給銀建坊以示嘉獎焉綜計生平善舉所費數十萬金無吝色亦無德容故筭財五十餘年時聚時散而故業不加增少患咯血比老轉強健歲時孫曾奉觴上壽公掀髯環顧怡然自得美意延年其斯之謂歟以同治庚午八月初二日考終於家距生於乾隆庚戌九月

二夕耳云不 卷三十一
二十八日壽八十有一道銜隨帶加二級

誥封通奉大夫以四子守謨貴

晉封榮祿大夫崇祀鄉賢祠元配王夫人繼配趙夫人子四
長守誠王出早卒次守訓候選同知加知府銜

賞戴花翎卒守謙候選同知加知府銜守謨

記名道俱

賞戴花翎趙出女二孫男十四孫女四曾孫一王夫人已別
葬於七家嶺今以同治十三年甲戌十一月日卜葬公於洪
村都西山卯向加庚申以公從弟景唐通政與濬頤齊年通

籍屬爲文誌幽乃作銘曰

躬善人溥厥利子象賢繼厥志歆俎豆名勿替後有述視此誌

謝母汪太淑人墓誌銘

濬頤與孟餘給諫同館同臺性情相洽曩官京師朝夕過從深知堂上太淑人持家教子以慈母而兼嚴父而孟餘奉親之孝至老不衰尤爲儕輩所推許洎乎持節嶺南量移邗上與孟餘別凡十五年歲必通問上叩起居孟餘書來輒道太淑人神明強固耄耄洊臻每一開函爲之色喜乃甲戌之夏

太淑人赴至則黯然悲吾孟餘遭此鞠凶也秋杪孟餘奉太淑人匱歸里潛頤往奠之嗣孟餘持狀來乞潛頤誌墓不敢以不文辭按狀太淑人姓汪氏系出於歙後乃占籍江都父象衡公太淑人幼嫻姆訓溫恭靜淑年十九歸於贈通議大夫莪衫謝公逮事尊章以孝稱謝氏世掌文匯閣書莪衫公以候銓府通判不樂仕進終日枕菲其間太淑人女紅之暇日佐繡帑雅得倡隨之樂道光甲午孟餘舉於鄉丙申莪衫公下世太淑人年已四十有六家中落乃躬操井臼勤儉刻厲課四男子下帷讀書攻苦不少休迨庚戌孟餘以進士第

三人入翰林聞捷之日正太淑人六旬周甲之辰里人榮之
顧東南方搆兵廣陵不守太淑人以咸豐癸丑避寇興化流
離轉徙安之若素壬戌由海道間關入京師板輿迎養而孟
餘始得舞綵承歡十三稔於茲矣自甲寅以來天孫曾男女
三人季子沒於里中孟餘又再失其伉儷太淑人屢撻憂患
達觀善遣怡然渙然晚乃究心內典惟以焚香禮佛爲事今
年三月十五日卒於京邸比殮面如生將以十二月十五日
歸柩於莪衫公之兆禮也莪衫公已有前誌世系具詳例不
再書故第述太淑人事並男女婦壻孫曾所系悉牒於左以

備刊石與阡表異焉。濬頤竊惟歐陽文忠公瀧岡阡表其述
崇公之懿也。壹本於魏國而不著魏國之內行。並史傳所書
畫荻事亦概從畧。蓋意在表揚先德。故惟主於崇公文章家
立言體制。應爾也。然不有賢母。令子曷底於成。今觀太淑人
內行純全。幾乎上追魏國。而孟餘在諫垣有直聲。固亦步
趨廬陵者也。孰謂古今人不相及哉。孟餘能秉母教。以博榮
名而揚其親。雖耆年冷宦。不改初服。行見大有設施。爲國家
用於以下。太淑人之遺澤孔長也。銘曰

是爲女宗。彤管揚芬。亦云壽母。梵夾證因。相夫劬書。訓子登

第衣食是力福德兼備躬膺翟莠疊晉鸞章歸眞淨土積善
餘慶幽宮合窆邦溝之側用勒眞珉千秋垂式

常鎮通海兵備道李君墓誌銘

廣陵與潤州南北相距才四十里中橫天塹而觀察使分巡
常鎮通海兼督揚由關權故其治在廣陵自大江以南立通
商馬頭設海關監督俾觀察使任其事遂駐於潤州廣陵被
兵治久廢然使者有權征之責則必時往來於大江以北也
李君叔彥於同治辛未仲冬履任君之大父觀察公故與先
大夫有齊年之誼叔彥又與家弟子巖道光己酉同舉優行

二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

濬頤官京師日以兩世同譜得訂交於君喜君之來把酒絮絮話春明故事爲我作一日留因與君約常相見也自是三年中君以事至廣陵予必觴君於待月謬予以事至潤州君必觴予於皆山樓癸酉八月十四日爲君五十初度予偕諸同人登焦山松寥閣爲君介壽甲戌三月君亦泛邗溝爲予稱六十觴君小子九歲體貌豐偉才識恢宏方冀其宣力朝廷游躋開府曾幾何時而君病病竟不起耶嗚呼君明決能持大體於中外交涉之事遵守條約不激不阿故商民咸帖然服矧孳孳爲善愷悌慈祥以理決之報施必厚乃甫逾

服官政之年而遽奪其算天道尙可知哉君卒於甲戌八月二十九日予旣過江哭之君之仲兄夢蘭率其孤肇文遷君之匱至廣陵厝於天寧寺僧廬將以乙亥之冬還鄉安窆窆而先以狀乞予志墓吾知君最深烏可無一言以表其幽按狀君諱常華字叔彥號韓齋先世由山西洪洞遷居河南之鄭州遂占籍焉曾祖煌廩貢生祖國瑞舉人官至江南淮揚河務兵備道崇祀名宦鄉賢父廣揚廩生官江南徐州府同知三世皆以君貴贈榮祿大夫曾祖母朱氏祖母楊氏魏氏母沈氏皆贈一品夫人兄弟四人長錫華早卒次翰華次寶

儉亦卒君其叔也道光甲申八月十四日生幼而穎悟少長
逾下帷攻苦年十八補博士弟子員甫舉優行卽登賢書庚
戌遭贈榮祿公之喪癸丑沈太夫人復棄養君皆哀毀骨立
喪葬盡禮咸豐丙辰援例以主事用籤分戶部時鈔票案起
君鈎稽詳慎上官獎其勞奏入

報可君以一人主貴州司稿而兼理軍需捐銅兩局以及豁
免處督催所捐納房眾務心維口畫紛然就理諸曹司罔不
服君之敏斷焉辛酉兼充總理各國事務衙門章京兩署趨
公寒暑罔間君彌奮勉克稱厥職同治甲子充錢法堂主事

乙丑補雲南司主事其間以金陵克復辦理捐務屢得獎叙
迨丙寅復奉

旨以本部員外郎遇缺卽補丁卯遂補福建司缺君之爲錢
法主事也直園法罷做之時籌買銅斤開爐鼓鑄擢員外例
得請代舉侍郎道遠重其才留爲幫辦錢法之有幫辦蓋自
君始戊辰偕理藩院郎中志剛查辦恰克圖稅務數月卽畢
事稱

旨晉三品秩交軍機處存記以海關道員用庚午京察一等
又以捐銅局勞績

賞加二品頂戴辛未七月拜常鎮通海道之

命十月復以前在鄭州本籍勸捐修城功荷翎枝之 賜君下
車之始卽廉得揚由各關向有充白役者假偷漏驀越爲名
多方婪索罰捐至數十倍大爲商賈之害出示嚴禁之吏胥
凜凜不敢因緣爲姦積弊頓除而

國課轉裕美國領事某性乖張商民交怨君白諸總理衙門
俾美國公使易之揚子江心風浪最惡操瓜皮艇子以濟人
舟殊不足恃卽須之涉時有戒心予與沈仲復觀察議設義
渡甫有成說仲復移節滬上而君繼之遂各捐廉俸爲倡並

勸諭商賈捐巨款以作義渡久遠經費郭外新河兵燹之後淤塞不通君力主開濬請於大府以利行人焦山向設救生總局而大港亦有一局適當圖山要衝因乏資將罷之君爲籌款接濟上下游賴以無恐太平洲界乎常鎮揚通四府州之間在江中突峙延袤八十餘里洲民惡習養女卽溺之仲復創立保嬰局君踵成其事留養女嬰至四百五十餘口其他鄉鎮皆仿而行之丹陽境內江灘民人墾種易啟爭端君議收其田租以供書院及各善舉之用課桑局則先爲借款采買並委官設局教民育蠶嚴冬散米以濟貧窮君躬爲表

率檄郡縣垂諸令甲海門俗尙火葬並劫發婦再醮皆按治
之不少貸壬申冬征丹徒二區鄉民洵洵不靖君密陳於大
府委前宰丹徒之田太守祚拘爲首者數人懲之其亂遂弭
君坦白和易與人交洞開城府從無急言遽色而操守廉介
絕不可以非義干天性孝友伯兄早沒無嗣遣所生女依嫂
氏膝下以博其歡心仲兄夢蘭典郡吾皖告歸迎之至署家
事無巨細悉聽裁決恭兄友弟同僚並欽慕之慷慨好施當
其官農曹時凡鄉里之應京兆及禮部試者舉有所贈其無
力出都者亦必依助之及擢外臺求者愈眾君則周恤備至

且視人之能否能者留以爲助否則資之就道親戚待以舉
火者蓋以百數十計君卒之日皆哭失聲君配任氏

誥贈一品夫人繼配韓氏

誥封一品夫人先君卒子女各一任夫人出是年十月二十
日卜葬於岳家寨先塋之東從形家言癸山丁向銘曰

君師我友溧陽侍郎弟先師死云胡不傷傷哉君師偕歸蓬
島晨星黯然我躬則藐哭君未已又哭君師我欲問君知乎
不知君之所苦折腰弗慣撒手而行永脫羈絆慈航普渡佛
感名洲三山墮淚去思長留邨城之西幽宮是宅千載不朽

二夕車
卷三十一
視此貞石

董燧臣封翁墓誌銘

濬頤與策三農部爲文字交始相見於嶺南卽服其篤厚樸
訥夙秉過庭之教迨同治己巳來揚州則策三已乞假歸里
因延之入淮南書局並預修揚州府志策三於編纂之暇輒
挈舟還孟城定省孝思藹然形於辭色旣心欽之復聞高郵
人士言燧臣先生抱道講學於尙義故其子得成進士惜
乎濬頤之近在邗江未獲一親杖履也而又深重策三之壯
歲辭榮楮陔孝養爲不可及也光緒初元孟春策三遭先生

喪將卜葬持狀眎濬頤丐文以埋其幽按狀先生姓董氏諱丙元其先爲元集慶路人至正間始遷高郵三世祖璘前明翰林侍講學士以忤王振罷歸見明史劉球傳曾祖綏國子監生妣王氏祖有臺州附學生妣胡氏父之鏞州附學生妣吳氏皆贈承德郎贈安人先生嘉慶十三年七月二十一日生家本寒素幼入塾讀書聰穎異常兒母吳太安人以紡績佐饗殮晨興遣婢持綾入市易餅代炊綾或無售者則日昃不再食率以爲常先生雖饑餒而估畢無少休父侶簣公尤鍾愛之二十一歲舉茂才以年資貢入成均先生爲制舉文

力宗先正法程手鈔周秦諸子史記漢書文選唐宋諸大家
文擇其精者裝爲巨冊高三尺許字畫端整丹黃爛然十應
秋試僂得復失者三先生了不介懷門下生徒請業者先後
幾及百人皆有聲黌序或擢科第以去而先生獨偃蹇一矜
將終其身乃不於其身於其子報之且親見其子成名先生
可以無憾已先生心性之學受之侶簞公嘗曰孝弟忠信本
也文藝末也故其內行完粹事大父母父母以孝聞伯兄月
樓先生下世遺孤尙幼飲食教誨侷於所生與人交洞開城
府真誠無妄言動必軌於正有背乎義者則面訶之聞一善

則稱揚弗絕於口人咸敬而感之平居慷慨負奇氣有經世之志既不見用於時顧殷然以仁民愛物爲念惡衣惡食省嗇所入藉周貧乏族儻中月有廩歲有餼待其舉火者凡數十家見人媁媁問所苦委曲周詳過於人之自謀遇急難毅然引爲己任不計利害鄉里交頌先生先生愀然曰吾曾大父曩市炭得遺金舉以畀失者有司榜所居曰還金吾曾大母冬月輒以己之絮衣施貧者吾大母以新襦進越日而又施也及吾父恪守祖訓好施如故不以貧廢故三世皆稱長者吾敢望先人乎先生邁疾孤寒來問者輒四出祈禱請以

身代古所稱癯先生沒而可祀於社者嗚呼先生其無媿哉
先生官候選訓導以子對廷貴

敕封承德郎

覃恩誥封奉政大夫配宋氏

誥封安人生子三伯卽對廷乙丑進士戶部廣東司主事次
覲廷次倫皆州附學生孫二增祿增第先生卒於光緒元年
正月初五日春秋六十有八易簣時訓其三子曰熟復四子
書自有無窮裨益又曰儒者當以天下爲己任匹夫匹婦不
得其所古人恥之若苟竊名祿非吾子孫也觀臨終教子之

言先生之品與學洵乎至純且粹已以某月某日葬某爲之
銘曰

封公有德貽令子箕裘無忝式穀似嘉言懿行在人耳文游
臺畔空仰止溯洄從之璧湖水鯁生謗陋慙作譚云紀實行
匪溢美

贈內閣學士前署安徽巡撫安徽布政使吳公墓誌銘

公姓吳氏諱坤修字子厚號竹莊江西新建縣人曾祖一崑
母何氏祖嗣葵母李氏父敬炤母葉氏三代以公貴皆贈光
祿大夫母皆一品夫人公家素貧未冠卽橐筆走四方嘗由

山左而吳中而嶺南而楚北而春明晝爲人治事夜則篝燈
讀寒暑罔間兩應京兆試一應本省鄉試不售道光二十九
年援例以從九品需次楚南大府檄辦湘陰災賑全活甚眾
三十年從湖廣總督裕泰公越武岡州剿辦新甯亂民李沅
發事平獎叙免補本班以府經歷縣丞補用蓋公初入仕卽
以兵事顯也是年粵匪起檄赴永州防堵旋以母憂歸咸豐
二年粵匪犯長沙巡撫駱文忠公奏留公辦理軍務長沙圍
解叙功擢知縣三年以剿桂東土匪勞績免補府經歷縣丞
本班至是粵匪張甚由武昌連陷九江安慶金陵進逼江西

南昌於是湘鄉曾文正公以侍郎家居率湘中子弟勤王赴義檄公乞饗於嶺南是年冬從曾公駐衡州創水陸兩軍四年以克復湘潭功晉同知秩

賞戴藍翎會我軍一失利於岳州再失利於靖港公佐曾公蒐討軍實掇拾補綴以復成師是年之秋東克武昌漢陽田家鎮冬以水師乘勝攻九江大舸蔽江岸別以舳板小艇持半日糧下湖口奪賊梅夾洲浮橋入鄱陽湖既至姑塘而賊復合踞橋以斷我後逮夜我大軍燬於火曾公慮水師陷於湖不得出無統帥且饑潰使公單騎間走南康領之公移舟

燭吳城傾家資並勸戚儻輸錢米餉軍軍以無恐是役也我師大勦微公事幾殆十二月遂以水師下都昌復就食於南昌待曾公進止五年正月曾公自九江至追論田鎮功擢同知仍率水師防堵瑞豐三月丁父憂既歸葬曾公奏留公治羅忠節公一軍餽餉往援楚北是冬以克復咸甯蒲圻崇陽通城四縣功湖北巡撫胡文忠公奏請

賞換花翎六年江西各府皆陷曾公因內湖江楚道梗公先統水師至是胡文忠公以新募之陸軍曰彪營者俾公與劉騰鴻普承堯合師援江沿途再克咸蒲崇通入江境兩復新

昌上高進規瑞州曾公奏擢知府旋由新昌取道羅坊攻奉
新出賊不意營獅山梯城而登賊死守不能卒拔乃先下安
義靖安而後萃於奉新明年克之公嘗以是役殺傷太過爲
恨時軍需告匱饑不時至公就地勸富人輸將且以其贏解
濟省垣安輯諱潰事訖力爲請獎其有汙賊僞職反正者爲
固請弗問人以是無怨而重德公會公知公可大用遂以道
員記名請

旨簡放既與諸軍合圍瑞州軍中拜廣東南韶連道之

命仍留剿賊賊乘夜雨突圍他軍不支聽其竄越莫適任咎

公願獨承之巡撫耆齡公奏褫花翎城下之日復請賞還冬
我東鄉師潰省城戒嚴公孤軍扼康山賊不能越而湖南北巡
撫合詞劾公濫招游勇奉

旨革職交江西巡撫查辦公散所部無一卒譁者耆公爲昭
雪免議九年耆公奏以公督辦撫建甯三屬團練立團防營
旣成軍卽出境援徽公自是遂入皖矣十年春克建德督辦
皖南軍務左副都御史張文毅公奏開復原官花翎時韋志
俊新降以其眾驟至洵洵懷反側公資遣之赴東流大營綏
以威惠得無變而徽郡復告急奔命往援公於徽防爲客軍

惟主者檄所向公弟修攷以參將偕道員蕭翰慶接浙與公會休甯別去死湖州之難公乞假歸秋擢防兵潰勢岌岌公方在假公弟今蘇州候補道修攷攝軍事由嶺外郭村奉檄返江西行伍肅然時曾公已督兩江軍祁門嘉之益信公治軍有紀律也使守湖口而賊圍建昌益急巡撫毓科公檄救之抵撫州賊由金谿竄東鄉移師迎擊於鄧家埠大破之賊復自貴溪竄安仁我軍隔河不能渡賊復竄德興萬年之交將擾景德鎮公由饒州馳赴景德以固祁門大營之後獨往謁曾公直我建德師潰賊將上犯曾公予公三日期馳保湖

口公戰賊而行先賊至城得完毓公奏加鹽運使銜以獎其勞明年曾公檄守無爲旋移廬江自此公遂長駐皖矣同治元年曾公使公乘輪船如上海勘江陰沙還以公筦營務處仍統團防營駐蕪湖與金陵甯國兩大軍相首尾號令嚴整江介肅清賊伺聞來犯輒擊追之曾公不次奏獎格於吏部新章奉

旨仍以道員記名簡放二年

召公及修數赴山東防剿曾公以江南事尙棘奏止之公雖未行亦可知

朝廷倚公之重矣夏我軍克金保圩秋復高淳溧水及溧陽東壩諸隘公皆有功三年春

賞加布政使銜嗣以克復金陵功

記名以按察使遇缺題奏四年署徽甯池太廣道補安徽按察使五年署布政使至是公始親吏事初公治軍以嚴稱及治民則噢咻煦嫗有如傷之仁安徽巡撫英翰公駐師潁州時時出境剿賊公在省治轉輸餉饋未嘗遲乏起學校葺公廨率作興事百廢具舉不使英公有內顧憂英公由是稔公才七年英公丁父憂還京謂公清介剛勇堪膺大任請以臬司

攝巡撫事奏入

報可未幾補授布政使逾年

上命英公回皖撫任公回藩司任公以前遭父母喪未及在籍終制乞歸補制百日假滿入覲又逾年而受事至則澄汰利弊規復舊章捐置學宮禮樂器選諸生肄之陶淑有具民氣大和郊市之間熙熙攘攘忘其爲兵燹後皆公之力也公長身鵠立論事鬚髯奮張人多憚之而其慈祥惻惻則發於至誠初從曾公使讞獄某弁犯微辜曾公怒欲誅之公力諍而免估客十餘人遇盜喪資斧邏卒得之居爲獲謀功公悉

縱遣去凡公殺賊不可勝計所將卒有犯法者皆勿貸而平
心活人乃多類此公在軍最久前後以功得官屢晉秩然公
異軍特起所統禁少又或迴幹於敗挫之後賞不得行或顛
蹶於艱勤之時黜非其罪故雖以末僚起家游陟屏藩兼權
疆寄而人心猶覺歉然以公爲未竟其用也轉戰歷數省服
官則於皖故皖人尤思公生平篤於道義師事曾文正公垂
二十年文正薨哭諸寢哀甚氣鬱成腦疽疽雖獲瘡而氣血
大傷疾發終不起公以嘉慶二十一年閏六月初七日生同
治十一年九月二十四日卒於官享年五十有七巡撫英翰

公奏請照軍營立功後積勞病故例議卹

上俞所請贈內閣學士銜廕一子入監讀書期滿以知縣用
公元配張夫人繼配彭夫人皆以公署巡撫時恭遇

覃恩贈封至一品子明鐸先公卒公以彭夫人及箴室劉氏
洪氏數生女復嗣猶子明鈺明田爲已後孫則藩候選郎中
軍功

賞戴花翎曾孫孝先孝民女某某皆字名族公不侮鰥寡不
畏疆禦獨立天壤以成功名敦尙氣節所居之室輒榜曰結
歲寒綠館嗚呼可以見公之志已江西之忠義祠吾皖之忠

義節烈祠曾文正公專祠皆捐俸獨成之輕財好施不殖生
產饌客至豐腆而常餐不過薑豉醋嗜書籍藏弄至數萬卷
沒之日家無餘財善草書樵孫過庭書譜得其神髓好吟咏
矢口而成動合於古著三恥齋詩十卷校刊半畝園叢書三
十卷濬頤爲公部民初不相識猶憶同治戊辰之秋量移兩
淮度嶺而北十二月抵皖江謁公公欣然握手曰吾聞鄉人
勒少仲觀察數稱君故久知君名今幸得解后誠天假之緣
也卽留飲勿使去抵掌慷慨談天下事所以期許之者備至
互有贈答旬留度歲除夕復治具招飲瀕行送諸郭門依依

不忍別追己已又有嶺南之役孟冬始返廣陵適公朝天北上復相見於何氏壺園自是箋奏往還傾吐肝膈不同恒泛方冀公指日真除建牙開府長爲吾皖蒼生之福而執意從此永訣耶吁可慟也公歸道山已三稔哲弟伯莊觀察以事來揚州持武進管才叔所撰狀眎濬頤曰某日日將卜葬先兄於某原乞子爲埋幽之文濬頤不敢辭也敬作銘曰

槃槃大材善治軍旅蹶而復起驅除狼虎公本書生乃握韜鈴受知文忠文正繼焉勇捍粉榆功在桑梓左右相侯欲行且止甫偃戎旃載持使節咨汝旬宣遑勞陳臬獨秀突兀大龍嵯

峨從容坐鎮舍公則那直諒果毅表裏如一嚮用方殷云胡
顛踣弟子從師控鶴廣桑萬民尸祝千秋勿忘嗟予撫膺輒
呼負負公之姻家我之死友卓然可傳一代偉人後有作者
視此貞珉

孫母吳太夫人墓誌銘

同治十有三年孟春萊山學士視學閩中任滿奉母吳太夫
人還京師道吳中適太夫人病乞假一月延醫調治少瘥於
三月抵廣陵予與梧江廉訪爲甲辰同年交最篤萊山固梧
江之從弟其猶子駕航觀察之女又爲子孫婦萊山知予之

第五女待聘因爲其仲子請婚於子作三日留子欲登舟拜
母而太夫人以病謝遂迂道返沛上未幾見邸鈔萊山因病
陳請開缺則適然驚旣又陰念必太夫人病革也仲冬赴至
今年二月萊山復遣下走寄眎告殯文云毓汶於正月某日
卜葬某阡乞爲志墓予讀萊山之文眞摯沈痛一字一淚心
旣服其純孝而太夫人之美德懿行顧安可湮沒弗傳於後
耶爰不辭謏陋而爲述之太夫人姓吳氏本吳人幼卽患寒
溼嬰腹疾治之全瘳年十六歸孫文定公爲簾室時正室葦
太夫人已下世太夫人逮事寄浦相國淑慎靜婉能博堂上

歡文定公於道光丁酉服闋入都供職悉以家事委之太夫人處事精詳克勤克儉內外周庀物無棄材至於贍卹戚御扶持孤弱太夫人曲體文定公寬厚待人之意殫心竭慮而爲之人歌公德而實則皆太夫人總理勗勤之力也文定公之再出也年逾五十患歐血症遇勞輒犯太夫人夙興夜寐於飲食起居調護維謹數十年如一日以故文定公屢持使節洊陟農卿得以盡瘁廟廊無內顧憂迨七旬以後養疴京邸杖履優游微太夫人烏能及此耶治家之餘性尤好學讀全史三過旁及卜筮星相之書靡不研究曉天文辨躔次博

通淹貫有大家風萊山駕航叔妣年相若太夫人爲之經營
婚娶迄於成立先後並登科第太夫人之訓萊山者萊山舉
以告予曰讀書偶惰則訶之性情褊急則規之少年豪放口
不擇言太夫人曰毋妄發也昧於時宜方圓杓鑿太夫人曰
宜知節也蓋以慈母而兼嚴父義方之教媿美湛韓俾萊山
登著作之庭樹山斗之望披沙剖璞迭掌文衡豈偶然哉顧
太夫人夙有癥瘕之疾旋治旋發家事煩冗病根未除重以
海瑞卑濕所患加劇迨歸里後纏綿不已竟於十月十八日
棄養享年五十有八以子毓汶貴

誥封恭人

晉封夫人孫三槌榮榕萊山書云奉安窀穸在先公先妣之側吾母氏九京靈爽庶有憑依也銘曰

嗟我四齡卽失所恃嫡母撫之有如己子祿弗逮養抱恨終天因循至今始克表阡君書忽來使我腸斷鮮民之生中心寤寤我不如君遠奉板輿三山侍養足報勞劬我不如君躬親含殮母兮全福佳城歸窆學士家聲上紹歐陽焚黃告奠無異隴岡丸丸松柏蔦蘿則施敬告幽宮徽音永企

王母盧孺人墓誌銘

二夕耳之不
卷三十一
鳴呼在室爲孝女既嫁爲令妻爲順婦而又爲賢母遭顛危
處窮約不改其常而碩德懿行足傳於世者如王母盧孺人
洵可風已孺人姓盧氏浙江黃巖人祖孝廉塤父處士肅炬
幼而穎慧女紅之外喜讀書通五經大義旁及文史兼工吟
咏年十四母卒哀毀絕粒其父固喻之乃強食亡何父亦病
醫久不瘳泣禱於天請以身代割左臂和藥以進病果瘥及
笄適王維齡事翁姑一如其事父母也夫之諸弟夫之妹幼
穉嫂教之讀若嚴師然以婚以嫁勿勞厥兄勤治內事饗殮
井曰率以身先之迨諸猶子出就外傅每日歸必令背誦所

讀書熟則使就寢暇日與夫子伉儷以詩風雅倡隨致足樂也咸豐十一年粵寇犯浙東是時維齡之父及仲叔兩弟皆已下世維齡與季挈全家避難邑之五部轉徙築坑其地在萬山之中昆季輒重趼踰嶺迢迢數十里負米還家孺人先潔膳奉姑以次及長幼已則獨啖薯蕷和麥屑充腹而已越明年四月寇退得歸而孺人病矣家故貧亂後益困力佐維齡持門戶焦勞不得息竟以同治四年卒年四十有六孺人生子五禹堂同治庚午舉人无郝國子監生士鏞士鏞士鏡孫四所作詩散佚禹堂輯存一卷曰焦尾閣遺稿以某年某

月日葬某銘曰

傳者誰南匯張誌者誰定遠方德若此胡不壽內行完女宗
首死無憾兒成名寶氏桂儕其榮夫何諛亮哉質表芳型視
此碣

陳母張太孺人墓誌銘

子勤孝廉爲予門人劉鑄山太常丁卯江南鄉試所取士予
延之課孫燕昭已三載循循善誘俾小子得膺拔萃之選知
其夙秉母教端品勵學爲潤州人士所推重近則僑居海安
設帳課生徒以供菽水自來廣陵歲時必拏舟歸省前年爲

其母太孺人稱七十觴予每敬問起居子勤則敬對曰堂上
神明不衰蚤作晏眠無一日安子婦所弗及也今年春太孺
人病予止子勤勿來亡何赴至子勤既成喪持狀丐予爲文
以誌其墓按狀太孺人姓張氏諱友書字靜宜丹徒人祖榜
四川丹稜縣知縣父壬邑諸生母殷氏父早卒兄崇蘭字悔
廬以舌耕奉母太孺人時尙幼卽能以女紅佐饗殮顧性穎
慧好讀書過目卽了了工詩鍼黹之暇不廢吟詠適同里選
拔貢生陳宗起字敬亭故名儒內行尤篤事母柳太孺人以
孝聞太孺人旣于歸相夫子克盡婦職柳太孺人衰病喜怒

不恒則曲意將順之雖勞勿怨生長男克劬卽子勤柳太孺
人愛孫甚聞其啼輒怒時方炎暑太孺人患瘍兒亦患瘍首
不能就枕眠恒自忍痛終夜抱兒膝行帳中搖撼之俾兒眠
熟恐啼則觸姑怒也其孝而且慈類如是柳太孺人下世敬
亭先生遂絕意進取一以著述爲事嘗謂太孺人曰自恨生
平學殖荒落未能顯親揚名今欲壹志於學冀有所造就家
事悉以累君可乎太孺人素善持家自是益黽勉鉅細必躬
親之申饋而外刀尺之聲夜常達旦戚儻稱其賢敬亭先生
下帷攻苦致成疾太孺人生次子克常才數日竭力侍湯藥

昕宵罔閒或勸以新產宜少節勞太夫人正色曰夫天也天方難測敢自愛乎逾數月知不起號泣籲天願以身代泣盡繼之以血已而竟不起哀毀絕粒痛不欲生既乃顧二子一女歎曰吾之從夫於地下分也其如此呱呱者何吾已許夫子於生前敢食言乎蓋敬庭先生易簀時知太孺人有死志故以子女相屬也是時太孺人年甫三十克劬才七歲克常生甫兩月女才四歲家故寒素嫁時衣又盡充藥餌之費不得不取給於十指間飽其子女已則忍饑未嘗向鄉里貸一斗粟也悔廬與敬庭平素以道義相期許閱其妹之無家也

招之往太孺人亦以兩子不可廢學遂攜子女往依兄殷太孺人春秋高嫂氏吳病不能理家政悔廬謂太孺人曰妹之二子教養在我我之家事願妹任之以分母氏憂太孺人既爲兄持門戶兼撫子女辛勤備至居母家十五年中間遭嫂氏之喪爲經營喪葬又爲兄續娶林氏並嫁其二女絕不煩老母過問克劬舉茂才欲迎歸奉養又以殷太孺人年益高不忍離剡下越二年殷太孺人棄養終喪乃歸謂二子曰吾爲汝輩讀書計竭力以報舅氏之事既畢而吾家之事方始矣乃葺屋宇修器皿爲克劬娶婦柳氏又嫁女於高氏屏當

未就猝遭粵寇之亂倉皇出走太孺人淒然墮淚曰家中無
長物今者拮据羸了室家之事欲以報吾夫於地下也乃顧
若此豈天不欲成吾志耶因渡江北行間關至泰州東鄙之
海安鎮遂家焉克劬早有文譽故負笈從游者甚眾甘旨賴
以不缺太孺人既經喪亂彌復省嗇旋爲克常娶馮氏逾年
生孫而克常又以瘵卒克常才氣過人太孺人尤鍾愛之於
其卒也悲不可支幸克劬舉於鄉意少慰然以夙嬰憂患之
身重遭流離摧折雖眠食無恙而心力則交瘁矣克劬勸其
勿計米鹽瑣屑則怫然曰吾食貧茹苦數十年以至於今幸

得温飽汝輩遂欲吾作廢人耶且吾習勞已慣固安之毋多
言生平明於大義教子不事姑息見一善則喜曰汝父嘗爲
此曷勉旃見一不善則怒曰汝父曷嘗有此速改之毋貽汝
父羞以故二子皆無違行太孺人苦節得

旌於

朝著工餘吟草越吟草海鷗吟草詩詞各三卷卒之前一夕
猶諳諳以勤儉二字爲家人戒嗚呼若太孺人者殆終其身
於憂患者歟嘉慶八年十一月初八日生光緒元年三月十
三日卒春秋七十有三將以某月某日合葬於敬庭先生之

瑩銘曰

魯敬姜耶宋歐母耶上追古人傳萬口耶我交令子淑德是
欽冰霜之操松柏之心有坊表衢有祠歆祀厥後必昌遺徽
彤史峩峩三山滔滔大江呼匠伐石幽宮永藏

誥授通奉大夫廣西柳州知府孫君墓誌銘

嗚呼濟頤於道光甲辰通籍我侶梅同年時官秋曹勤治獄
不獲數相見偶爲文字之飲則脫畧形迹洞開城府連舉數
十觥了無醉態而氣度雍容性情醕厚予固心折焉以爲今
之古人也嗣粵西粵東分馳宦轍十餘年之久音問濶絕追

至同治癸酉之夏偕梅擊舟過邗上則已弃官爲諸侯座上
賓爲講舍弟子之師長身修髯興復豪邁與予話別後情狀
觴之儀董軒抵掌雄談盡歡而散次日甫起則門者持詩筒
至矣予亟走筆答之而和章又到爭奇鬪險屢戰不休予曩
第知侶梅雄於文又烏知其雄於詩若是歟不奕而喜看奕
輒於待月謬作壁上觀奕罷卽命酒句留三月餘唱酬之作
得數十首計甲辰到今三十年矣三十年中惟此會爲最樂
因約來歲渡江更圖解后乃去年書來以病不果行又有鼓
盆之戚今年夏初突聞凶耗喪我心交傷何如也重陽後其

嗣子國榮以狀抵予乞爲誌墓予笑能辭按狀君姓孫氏諱
壽祺字錫祉號子福又號侶梅晚號西溪梅叟先世自常熟
徙居太倉州遂家焉曾祖世興妣氏黃祖震妣氏周氏曹父
鳳岡妣氏李三代皆以君貴封贈如其官君昆弟六人齒居
長嘉慶十七年十一月十一日生君甫弱冠卽爲諸弟授經
口講手畫孜孜不倦以故列膠庠登賢書者後先相繼皆君
之力也幼穎異八齡卽奮志讀書每至夜分舉家酣寢猶呶
唔不輟漏三下乃已十二歲學詩古文辭十三歲學制舉藝
尤好吟詠與同里友人聯社並以道義相切劘學益進庚寅

舉茂才輒試高等天性孝友以家貧設帳授徒藉修脯爲菽水資養志承歡無微不至癸卯甲辰聯捷成進士官刑部主事君讀律如讀書朝夕研究手定爰書雖老於刑名者咸歎弗及長官倚重之

上問尙書某公刑部司員誰能實心辦事某公以君對當時贈君詩者有西曹第一人之譽蓋紀實也顧君趨公奮勉寒暑罔間披覽案牘竟夕不寐心力交瘁致患怔忡之證且以思親念切癸丑乞假南歸抵家病少瘥乙卯主講師山尋就今福州將軍星崖公之聘佐幕揚州丁巳以團防籌餉功奏

獎免補主事以知府用復隨星崖將軍至揚州戊午以克復瓜洲功奉

旨以知府遇缺卽選君赴部謁選到京甫六日聞訃贈公乘養星奔以歸哀毀骨立喪葬盡禮泊庚申粵寇入吳復隨史懷甫觀察辦理軍事時大江南北盜賊蠡起郡邑紛紛淪陷軍書旁午寢饋弗安常州爲賊所困復奉張壁田軍門檄至無錫堵剿君以一書生馳驅戎馬屢冒鋒鏑擊賊有功繼隨江小雲觀察辦理糧臺文案兼製造捐輸報銷諸局駐高郵辛酉至鎮江賊薄城下攻城甚急君晝夜登陴規畫戰守與

觀察同作浩氣歌以見志從容鎮靜激厲將士絕兵出戰卒
解城圍癸亥入都部選廣西柳州府知府乞假歸里奉母李
太淑人之官並體親心令適王女弟之孀居者挈子女及諸
猶子同行君素好遊是役也詩滿行篋舟至洞庭大雷雨驚
波駭浪從者變色君方酣卧醒而告家人曰自問忠信可憑
何畏蛟龍之厄坦然就枕無何而風頓息旣抵桂林大府稔
其才欲留讞獄而同僚亦以柳州地瘠民貧戒勿往君則以
奉

天子命不敢避艱苦矧兵燹之餘瘡痍未復固二千石之責

也曷敢舍難就易乎大府彌賞之議於藩庫每年津貼千二百金以爲公費君下車之始簿書煩冗一一釐剔之實事求是興利除弊禁絕苞苴胥吏官給口糧不許用民間一錢出入一蓋一輿屏去騶從所屬八州縣與之明定章程曰懲誣告曰清積案曰慎詳銷曰訪訟棍令下而舞弄刀筆武斷鄉曲者率聞風遠颺府治燬於兵燹則多方那移稱貸鳩工庀材費不足則典衣以繼閱二年落成繪圖作記嵌石於壁隙地治圃名曰拙圃爲公餘歌詠之所署清勤於堂以自勵并修文廟 萬壽宮羅池廟劉賢良祠皆捐廉爲之倡直歲大

旱步行至距城十餘里之龍潭祈雨炎暑赤日面目盡黑經
兩旬得雨乃止饑年米價騰貴爲采買轉運以資接濟又籌
建義倉儲穀半貸商而薄其息以供平糶復繕完城垣兵房
更築礮臺以備防守百廢具舉且易衣微行訪問民間疾苦
柳江向爲文物之邦自罹烽火八輟絃誦君督所屬牧令振
興學校書院則延名流主講厚其膏火郡試日坐堂皇殫心
校閱多士爭自濯磨文風日盛或令諸生導引城廂內外訪
古臺碑有頽廢者悉皆修葺人以柳柳州稱之乙亥奉檄赴
自父老羅拜道左祝太守重來不數月君果回任故有孫公

再來天有眼之謠古所謂召父杜母君殆其匹耶治柳三載尤以表揚風化爲先凡孝子節婦皆請旌於

朝馭吏雖嚴而量材器使寬其責備亦無曠職牧令來謁必誠之曰州縣爲民父母當思無媿此四字所以無媿不過使各得其所爾不延幕賓文書尺牘皆手自屬稿蒼頭祇一二入必擇謹愿者公費外他無所取官廨食指浩繁炊烟時斷君處之晏如也或曰君爲貧而仕今因仕更貧奈何曰非不愛錢欲勉爲清白吏耳會以強項忤上官某遂遇事齟齬有訟案涉於請託君力爭之因假他事誣劾大府惑之補行大

計以才力不及去官士民往請於大府曰此非吾意曰疏由
公上奚云非公意柳之人實受太守福闔郡口碑具在公寯
弗聞之大府不能答於是眾謀建生祠立德政碑君力卻之
曰典郡三年毫無建樹內疚於心七千里外幸得奉母還鄉
吾願足矣惟以衙署未葺工書院課藝刊未竟旬留一月瀨
行餽贖一無所受衙衢里衢黏詩盈壁馬平胡次封孝廉有
句云公到柳州公獨窮公去柳州民無宗柳真累公公愛柳
公不棄柳柳負公是日祖餞者不絕於道而君則黎明已徒
步出郭門矣官紳軍民拏舟相送數十里有至水口登岸百

里之遙不忍言別者君固辭馬平崇令君獨攀轅痛哭餘皆
流涕太息而去行李蕭然惟益蘭卷石圖書數卷而已石上
自盟曰磊磊明明清清白白一權柳江載茲片石謂諸子曰
異日還鄉當繪介石貞蘭圖也歸舟以詩紀程丁卯到籍旋
奉母命橐筆從戎隨合肥相國逐賊於齊魯燕趙鄭衛之間
戊辰以擒匪肅清奏獎奉

旨開復降調處分仍以知府遇缺卽選嗣主講宿遷書院已
已復就星崖將軍之聘入閩庚午以前辦江南糧臺勞勩晉
三品秩又以剿擒匪獲優叙三在皆得二品封典洵異數也

辛未遭母喪盡哀盡禮如贈公時壬申主講師山瀛洲兩書院兼修海門廳志崇明縣志君原配宗淑人繼配卽淑人女弟亦封淑人子四人長寶善蚤卒原配出次卽國榮君仲弟壽康子出嗣爲君後次寶嶼原配出次寶麟繼配出皆殤女子八孫一家相甲戌繼配宗淑人卒君先在崇明感暑溼舊疾復作至是疾更劇以光緒元年三月初七日卒年六十有四國榮書曰府君當析產分爨時以己與三叔父皆服官在外各以所分之田爲膳田供先大母甘旨先大母見背則歸諸公田迨歸田諸叔父讓屋以居府君則仍居兒時讀書處

才四楹曰吾固樂之事伯祖芝軒公如事先大父待手足以誠自首怡怡至今罔間慷慨好施予急人之難所求無不應南北往還到家輒先展墓博觀羣籍尤服膺近思錄厭聞二氏之說遺命禁用浮屠氏自奉儉約敝衣十年不易每飯不過二盞遇事勇敢而持之以沈默堅定而出之以和平故愈倉卒愈形暇豫教子弟曰耐貧讀書安分守己毋好近名毋貪小利毋昏於怨己而明於責人嗚呼國榮能不忘庭訓縷述若此予旣喜其克家而重爲侶梅同年痛也至謂生平所欽佩者以予儕之宋雪帆劉融齋兩同年予何人斯謬蒙延譽

心滋惡已君著述宏富自訂詩古文辭若干卷藏於家生平
所好經史而外尤嗜金石丹青過眼卽辨真贋云宗淑人有
婦德能博堂上歡戊戌產後得疾不起彌留時屬君勿戚曰
我三妹賢淑可事夫子卽呱呱者亦無母而有母矣後二年
繼配宗淑人來歸女弟之賢若其姊撫子女如己出翁姑固
嘗言之以哭兒得肝證君從戎淑人憚遠行勸君納妾粵寇
之難淑人奉姑居孟城招叔姒同居君典郡治官書或終夜
不寢必秉燭危坐以待可謂賢矣將以某年某月某日合葬
於某銘曰

君才樂樂乃靡方面君遇厄厄乃老鉛槧三月之聚以謂可
再不分永訣使我心海高安方伯深陽侍郎大理繼之摧肝
斷腸自癸至乙及君而四落落乾坤更誰把臂問君之年長
予三齡君胡先歸厭棄風塵君歸天上名滿天下濡毫磨礪
屬後死者